

虛齋樂府

四部叢刊三編集部

上海涵芬樓影印黃
蕘圃顧千里校影宋
鈔本原書葉心高十
七公分寬十三公分

唐以詩鳴者千餘家詞自花間
集外不多見而慢詞尤不多載
朝太平盛時抑耆卿周美成
為新譜諸家又增益之腔調備
矣後之倚其聲者語工則音未
必諧音諧則語未必工斯其難
也余平時不敢強輯友朋間相

勉屬和隨輒棄去奚子偶於故
書中得斷藁又於黃玉泉處傳
錄數十闕共為一編余咲曰文
章小技耳況長短句哉今老矣
不能為也曰書其後以志吾過
淳祐己酉中秋芝山老人

虛齋樂府目錄上

萬年歡

大酺

孤鸞

金盞子

天香

探春慢三

龍山會三

芙蓉月

夜飛鵲

秋藥香

角招

徵招

揚州慢二

惜黃花

憶舊慢三

燭影搖紅

薄媚摘遍

沁園春三

賀新郎六

虛齋樂府上

萬年歡

慶元 聖節

鳳曆開新正微和乍轉麗景初曉五莢萸舒光
映玉階瑤草在在東風語笑慶此日虹流電繞
鯨波靜翠湧鰲山嵩呼聲動雲表絳節霓旌
縹緲望珠星燦爛紫微深窈琬液香浮露濕蟠
桃猶小疊疊仙韶九奏知春到人間多少蓬萊
外若木扶疎萬年枝上長好

大酺牡丹

正綠陰濃鶯聲懶庭院寒輕煙薄天然花富貴
逞天紅殷紫疊葩重萼醉艷酣春妍姿浥露翠
羽輕明如削檀心鴉黃嫩似離情愁緒萬絲交
錯更銀燭相輝玉瓶微浸宛然京洛朝來風
雨惡怕僛僛低張青油幕便好倩佳人插帽貴
客傳箋趁良辰賞心行樂四美難并也須拚醉
莫辭杯酌被花惱情無着長笛何處一笑江頭
高閣極目水雲漠漠

孤鸞梅

江南春早問江上寒梅占春多少自照疎星冷

祇許春風到幽香不知甚處但迢迢滿汀煙草
回首誰家竹外有一枝斜好記當年曾共花
前笑念玉雪襟期有誰知道喚起羅浮夢正參
橫月小淒涼更吹塞管謾相思鬢華驚老待覓
西湖半曲對霜天清曉

金盞子水仙

得水能僊向漢臯遺珮碧波涵月藍玉暖生煙
稱縞袂黃冠素姿芳潔亭亭獨立風前照冰壺
澄徹當時事琴心妙處誰傳頓成愁絕六出
自天然更一味清香渾勝雪西湖秋菊寒泉似

坡老風流至今人說殷勤折伴梅邊聽玉龍吹
裂丁寧道百年兄弟相看晚節

天香牡丹

蜀錦移芳巫雲散彩天孫剪取相寄金屋看承
玉臺凝眄尚憶舊家風味生香絕艷說不盡天
然富貴臉嫩渾疑看損肌柔只愁吹起花神
爲誰着意把韶華揔歸姝麗可是老來心事不
成春思却羨宮袍仙子調曲曲清平似翻水笑
囑東風殷勤勸醉

探春慢立春

南國收寒東郊放暖條風初回臺榭小燕橫釵
開娥低鬢根底吳娃天冶纖手傳生菜向人道
新春來也莫須沉醉樽前這些風景無價長
記年年此日迎着箇牛兒綵鞭羞打颺颺金幡
星星華髮得似家山閑暇都把心期事待問訊
柳邊花下簫鼓聲中溫存小樓深夜

探春慢四明除夜

屑璐飄寒鏤金獻巧粧成水晶亭榭飛絮悠揚
散花零亂絕勝翠嬌紅冶粉艷嘻嘻道盡飛上
史君鬚也多情莫笑衰翁舊時梁苑聲價窓

外小梅羞澁倩羯鼓樽前慢敲輕打鯨海停波
鶴譙賓月贏得殘年清暇心事知誰會但夢遶
越王城下白玉青絲且同醉吟春夜

探春慢 四明次黃玉泉

寶勝賓春華燈照夜窮冬渾然如客爐焰麟紅
杯深翡翠早減三分寒力一笑團圞處恰喜得
雪消風息苔枝數藥明珠恍疑香麝初拆 懊
恨東君無準甚朝做重陰暮還晴色喚燕呼鶯
雕花鏤葉機巧可曾休得靜裏無窮意謾看盡
紛紛紅白且聽新腔紅牙玉纖低拍

龍山會南豐登高

重整登高屐群玉峯頭萬里秋無極遠山青欲
滴新鴈過縹緲孤雲天北煙入小橋低水痕退
寒流澄碧對佳辰驚心客裏鬢絲堪摘風流
晉宋諸賢騎臺龍山俛仰皆陳迹憑欄看落日
嗟往事惟有黃花如昔醉袖舞西風任教笑參
差鳬舄但回首東籬久負有誰知得

龍山會

去年九日登南澗無盡閣野步賦詩
僕與東溪藥窓諸友皆和今年陪元

二三
戎遊昇山詰朝始克修故事則向之
龍蛇滿壁者易以山水矣拍欄一笑
游兄幾叟分韻得苦字爲歌商調龍
山會

九日無風雨一笑凭高浩氣橫秋宇羣峯青可
數寒城小一水縈迴如縷西北最關情謾遙指
東徐南楚黯銷魂斜陽冉冉鴈聲悲苦今朝
黃菊依然重上南樓草草成懽聚詩朋休浪賦
舊題處俛仰已隨塵土莫放酒行踈清漏短涼
蟾當午也全勝白衣未至獨醒凝竚

龍山會

四明重陽泛舟月湖

佳節明朝九綵舫凌虛共醉西風酒湖光藍滴
透雲浪碎巧學波紋吹皺碧落杳無邊但玉削
千峯寒瘦留連久秋容似洗月華如晝 回頭
南楚東徐暝靄蒼煙處處空刁斗山公今健否
功名事付與年時交舊白髮苦欺人尚堪插黃
花盈首歸去也東籬好在覓淵明友

芙蓉月

黃葉舞碧空臨水處照眼紅苞齊吐柔情媚態

竚立西風如訴遙想仙家城闕十萬綠衣童女
雲縹緲玉娉婷隱隱彩鸞飛舞樽前更風度
記天香國色曾占春暮依然好在還伴清霜涼
露一曲攔干敲徧悄無語空相顧殘月澹酒闌
時滿城鐘鼓

夜飛鵲

七夕和方時父韻

微雲拂斜月萬籟聲沉涼露暗墜桐陰蛾眉乞
得天孫巧惜惜樓上穿針佳期鵲相誤到年時
此夕歡淺愁深人間兒女說風流直到如今

河漢幾曾風浪因景物牽情自是人心長記秋
庭往事鈿花剪翠釵股分金道人無著正蕭然
竹枕練衾夢回時天淡星稀閑弄一曲瑤琴

秋藥香木犀

一夜金風吹成萬粟枝頭點點明黃扶疎月殿
影雅澹道家裝阿誰倩天女散濃香十分熏透
霓裳徘徊處玉繩低轉人靜天涼底事小山
幽詠渾未識清妍空自情傷憶佳人執手訴離
湘招蟾魄和酒吸秋光碧雲日暮何妨惆悵久
瑤琴微弄一曲清商